

TEKNOLOGIA

Hartzea ematea delako



DIANA FRANCO EGUREN

Azken 15 urteetan dugun Internetak hartu duen bilakaera ikusita, duen eredu teknologiko eta negozio ereduari lotuta, gizatasunaren alde txarrenak areagotzeko tresna dela pentsatu dezakegu. Ideia horrekin konforme ez dauden eragileak sortu dira mundu osoan zehar. Honako esparrutan lan egiten dute batez ere: eskubide digitalen babesa (informaziora sarrera, pribatutasuna, adierazpen askatasuna), eta bortizkeria digitalen aurkako borroka. Bide horretan, subiranotasun digitalaren beharra ulertu eta software librean aurkitu dute mundu ikuskera hori sustatzeko eredu teknologikoa.

Aurtengo Durangoko Azokako leloa entzun nuen lehen momentutik, "hartzea ematea da", software librearen iruditegi guztia etorri zitzaidan burura. Software librearen mundu ikuskerak berdin funtzionatzeko baitu: hartzen duzuna partekatuz, denontzako ezagutza handitzea lortzen da eta ezagutza jario hori biderkatzen doa, dugun digitalizazio eredu zapaltzailea ordezkatzeko alternatibak sortuz.

Eragite horretan, mastodon.eus sareak aurrean sei urte bete ditu. Bertan, euskal eremu digitala berresmatzen dabilzan eragile ugari aurkitzen dira, bizitza modu ezberdin ugari bizi daitekeen gisan, eremu digitala modu ugarietan ere ulertu daitekeela erakusten dabilzanak. Ez dute azpiegitura handirik, eta askok eremu digitalean egiten duten lana lanalditik kanpo egiten dute. Txoko honetatik, nire esker ona eman nahi diet, egiten ari diren lan onagatik. Eurretako batzuk, zeren asko dira, ezagutu nahi badituzu, Durangoko Azokako Kabi@Digitaleko aurtengo programan parte hartzera gonbidatzen zaitut. ●

NAZIOARTEA

Hagako auzitegiak Netanyahu atxilotzeko agindu du

JENOFA BERTHOKOIRIGAIN / GORKA PEÑAGARIKANO GOIKOETXEA

Gizateriaren aurkako krimenak eta gerra krimenak egotzi dizkie Nazioarteko Zigor Auzitegiak Benjamin Netanyahu Israelgo lehen ministro eta Yoav Gallant Defentsa ministro ohiari. Biak atxilotzeko agindua eman dute. Erabakia "antisemitismoa" jo du Netanyahu, eta Hamasek, aldiz, "Justiziarako urrats garrantzitsutzat".

2023ko urriaren 8tik hasi eta, gutienez, 2024ko maiatzaren 20ra arteko epeari so egin eta ondoko krimenak zehaztu dituzte epaian: "Gosetearen gerra delitua, gizateriaren aurkako krimenak, hilketak, jazarpenak eta beste ekintza anker batzuk". Gainera, Nazioarteko Zigor Auzitegiak dio "arrazoizko argudioak" dituela adierazteko bi buruzagiek herritarren aurkako erasoak "nahita egin" zituzeela. Ondokoa irakur daiteke erabakian: "Leporatutako krimenak Gazako zibilen aurkako eraso orokor eta sistematikoaren parte dira".

"Dreyfus epaiketarekin" konparatu du erabakia Netanyahu, urratsa "antisemitizatzat" joz. Bere aldetik, Bassem Na'im Hamaseko mahai politikoko ki-deak ondokoa adierazi du: "Justiziarako

urrats garrantzitsua da, biktimei errepazioa lortzeko aukera eman diezaiekeena, baina apala eta sinbolikoa izaten jarraitzen du munduko herrialde guztiek erabat onartzen ez badute". Erabakia "errespetatzea eta betetzea" galdetu du bere aldetik Europako Batasunak: "Ez da erabaki politiko bat. (...) Auzitegi baten erabakia da, justizia auzitegi bate-na", EBko diplomaziaburu Josep Borrellen hitzetan.

Hagako auzitegiak krimen berak egotzi dizkio Hamaseko buruzagi militar Mohamed Deifi.

HAARETZ JOMUGAN

Bestalde, Israelgo Gobernuarekin kritiko den *Haaretz* egunkaria ekonomikoki itozteko neurriak hartu ditu Israelek: diru publikoa jasotzen duen enpresa eta elkarte orok galarazita izango du publizitatea ipintzea *Haaretz* egunkarian, administrazio eta erakunde guztiek bertan behera utzi beharko dituzte harpidetza guztiak, eta instituzio publikoek ezingo dute hartu-emanik eduki egunkariaren, kazetariari kasurik egin eta sarbidea eman hainbat lekutara. ●



Netanyahu eta Gallant, prentsaurreko batean.